

- प्रधानमंत्री नरेंद्र मोदी तीन नुवा युद्धपोत देश ने समर्पित कीना।
- जलशक्ति मंत्री सी.आर. पाटिल जयपुर रा सांगानेर मांय कर्मभूमि से मातृभूमि जल सुधार योजना री सरुआत कीनी।
- दिव्यांगजन रा कौशल विकास अर वां ने मज़बूत बणावण बाबत् जयपुर मांय समेकित क्षेत्रीय केन्द्र रा काम री नींव रखी ज्यी-केन्द्रीय मंत्री डॉ. वीरेंद्र कुमार दिव्यांगजन रा प्रति सामुदायिक जागरूकता बधावण माथे जोर दीनो।
- प्रदेश मांय केई ठोड़ां बिरखा व्ही।

000

प्रधानमंत्री नरेंद्र मोदी कह्यो है के भारत विस्तारवाद री बजाय विकास री भावना ऊं काम करे है। श्री मोदी आज मुंबई री नौसेना गोदी मांय तीन खास लड़ाकू जहाज आईएनएस सूरत, आईएनएस नीलगिरि अर आईएनएस वाघशीर ने देश ने सूपण रे मौके बोल रह्या हा। प्रधानमंत्री कह्यो के भारत हमेशा खुला, सुरक्षित, समावेशी अर समृद्ध हिंद-प्रशांत हलका री हिमायत कीनी है।

प्रधानमंत्री कह्यो के आं तीन ई युद्धपोतां रे भारत मांय बणनो माथो ऊंचो करण री बात है। वे कह्यो के भारत हिंद महासागर हलका मांय सब ऊं पैली कार्यवाही करण वाळा देश रा तौर ऊं सामी आयो है। ई मौके रक्षा मंत्री राजनाथ सिंह कह्यो के ओ साल रक्षा हलका सारु सुधारां रो साल है अर ई साल रा आखिरी ताई रक्षा हलका मांय केई सुधार लागू कर्या जावेला।

जयपुर रा सप्त शक्ति कमान मांय ई सेना दिवस मनायी ज्यो। ई मौके आर्मी कमांडर लेफ्टिनेंट जनरल मनजिंदर सिंह प्रेरणा स्थल माथे शहीदां ने पुष्पांजलि अर्पित कीनी। बीकानेर, भटिंडा, सूरतगढ़, हिसार, श्रीगंगानगर, कोटा अर दूजा फौजी टेशनां माथे ई न्यारा-न्यारा कार्यक्रम राख्यी ज्यो। आं मांय **“नो योअर आर्मी”** मेळो, फौजी साज-ओ-सामान री प्रदर्शनी, रन फॉर फन, पीस वॉक, युद्ध स्मारकां रो दौरा अर सवाल-जवाब री होड़ां शामिल हैं।

000

सरकार केंद्रीय औद्योगिक सुरक्षा बल-सी.आई.एस.एफ. री दो नुवी रिजर्व बटालियन बणावण री मंजूरी दीनी है। ई पाछे सीआईएसएफ री बटालियनां री तादाद 13 ऊं बध र 15 व्हे जावेला। नुवी बटालियन मांय न्यारी-न्यारी रैंकां रा एक हजार ऊं बत्ता सुरक्षा कर्मचारी शामिल व्हेला जिण री अगुवाई वरिष्ठ कमांडेंट स्तर रो अहलकार करेला।

000

जलशक्ति मंत्री सी.आर. पाटिल आज जयपुर रा सांगानेर विधानसभा हलका मांय बिरखा रो पाणी भेळो करण ऊं जुड़ी **कर्मभूमि से मातृभूमि** योजना री सरुआत कीनी। वां रो अभियान रा तहत मुख्यमंत्री भजन लाल शर्मा रा रेहवास माथे राख्यी जावण वाळी जल संचय-जनभागीदारी ऊं जुड़ी चर्चा मांय ई शामिल व्हेवण रो कार्यक्रम है। ई दौरान मुख्यमंत्री, शहर रा करीब दो सौ कारोबारी अर समाज सेवी प्रदेश ने पाणी रा मामला मांय खुद रे पाण ऊबो करण रा बारा मांय चर्चा करेला।

000

मुख्यमंत्री भजन लाल शर्मा अर वित्तमंत्री दीया कुमारी काल ऊं न्यारा-न्यारा समूहां सागे बजट ऊं पैली री चर्चा करेला। आं मांय खिलाड़ी, महिलावां, सामाजिक कार्यकर्ता, किसान अर कारोबारी शामिल है। 22 जनवरी ताई चालण वाळी ई बातचीत रा तैत काल कर्मचारी संगठनां रा नुमाइंदां सागे चर्चा करी जावेला। ध्यानजोग है के 31 जनवरी ऊं सरु व्हे रह्या विधानसभा सत्र रे दौरान माली साल 2025-26 रो बजट पेश कर्यो जावेला। ई सारु प्रदेश रा न्यारा-न्यारा तबकां ऊं बजट ऊं पैली री चर्चा रे जरिये राय मांगी ज्यी है।

000

कांग्रेस पार्टी रा नुवा मुख्यालय **इंदिरा भवन** रो आज नई दिल्ली मांय पार्टी रा अध्यक्ष मल्लिकार्जुन खड़गे अर पार्टी रा संसदीय दल री अध्यक्ष सोनिया गांधी आज उद्घाटन कीनो। कांग्रेस मुख्यालय रो नुवो भवन कोटला रोड़ माथे बणायी ज्यो है। ई मौके पार्टी अध्यक्ष कह्यो के कांग्रेस रो नुवो मुख्यालय लोकतंत्र, राष्ट्रवाद, धर्मनिरपेक्षता, समावेशी विकास अर सामाजिक न्याय रा सिद्धांतां माथे आधारित है।

000

केन्द्रीय सामाजिक न्याय अर अधिकारिता मंत्री डॉ. वीरेंद्र कुमार दिव्यांगजन रा कौशल विकास अर वां ने मजबूत बणावण रा मकसद ऊं आज जयपुर मांय समेकित क्षेत्रीय केन्द्र रा स्थायी भवन रा काम री नींव रख्यी। वे सीआरसी रा अस्थायी परिसर रो ई उदघाटन कीनो। ई मौके खबरनवीसां सागे बातचीत करता थकां डॉ. वीरेन्द्र कुमार कह्यो के आं केन्द्रां रे मार्फत हर भांत रा दिव्यांगजन ने सेवा दी जावेला। मंत्री कह्यो के दिव्यांगजन रा बारा मांय सामुदायिक जागरुकता ने ई बधावो दियो जावेला।

000

मुख्यमंत्री भजन लाल शर्मा आज जयपुर मांय राइजिंग राजस्थान ग्लोबल इन्वेस्टमेन्ट समिट रा तैत ऊर्जा विभाग ऊं जुड़या करार माथे करी ज्या कामां रो जायजो लीनो। ई मौके वे अहलकारां ने निवेशकां सागे लगातार सम्पर्क राखणा अर सगळा काम टेमसर पूरा करण बाबत् कह्यो।

000

राज्य सरकार प्रदेश मांय न्यारी-न्यारी पुलिस रेंज रा हलका री अधिसूचना जारी कर दीनी है। गृह विभाग री ओर ऊं जारी अधिसूचना रे मुजब 7 पुलिस रेंज मांय ऊं जयपुर अर जोधपुर रेंज मांय सब ऊं बत्ता 8-8 पुलिस जिला शामिल करी ज्या है, जदके बीकानेर रेंज मांय सब ऊं कम 4 पुलिस जिला राख्यी ज्या है।

000

भारत मौसम विज्ञान विभाग री स्थापना री डोढ सौ वीं वर्षगांठ रा सिलसिला मांय आज जयपुर रा मौसम केन्द्र मांय तकनीकी प्रदर्शनी लगायी ज्यी। स्कूल-कॉलेजां रा करीब 400 विद्यार्थी अर शिक्षक इण मांय शिरकत कीनी। किशनगढ रा राजस्थान केन्द्रीय विश्वविद्यालय रा प्रोफेसर डॉ. राजेश कुमार "क्लाइमेट चेंज एण्ड इट्स इंपैक्ट ऑन ग्लेशियर्स" मुद्दा माथे प्रस्तुति दीनी। ई दौरान पोस्टर होड जीतण वाळा विद्यार्थियां ने ईनाम दिया ज्या।

000

भरतपुर रा केवलादेव राष्ट्रीय उद्यान मांय आं दिनां मोटी तादाद मांय प्रवासी परिंदा निजर आ रह्या है। हाल ही पेलिकन परिन्दा ई उद्यान मांय निजर आया है। ध्यानजोग है के पेलिकन री केई प्रजातियां संकट रो सामो कर रही है। म्हाणा खबरनवीस बतायो के उद्यान मांय अ परिन्दा दीखण ऊं पर्यावरण प्रेमी अर पक्षीविद घणा राजी है।

000

प्रदेश मांय नुवा पश्चिमी विक्षोभ रा असर ऊं आज केई ठौड़ां मावठ रा समाचार है। राजधानी जयपुर रा केई हलकां मांय आज दोपहरां पाछे व्ही बरसात ऊं नीचला हलकां मांय पाणी भर ग्यो। दौसा अर कोटा मांय रिमझिम बारिश व्ही। बारां जिला रा सीसवाली अर मांगरोल मांय छांटो-छिड़को व्ह्यो। चित्तौड़गढ रा गावाई हलकां मांय व्ही मावठ ऊं किसानां रा चेहरा मुळक गया। करौली मांय ई छांटो-छिड़को व्ह्यो। झालावाड़ अर बाड़मेर मांय सीळो बायरो बाजतो रह्यो। **करौली** मांय तेज ठंड ने ध्यान राखता थकां जिला कलेक्टर पहली ऊं 8वीं कक्षा ताई रा विद्यार्थियां सारु काल री छुट्टी रो ऐलाण कर दीनो है। भरतपुर मांय व्हे रही धुंअर ऊं आवण-जावण माथे असर पड़ रह्यो है। म्हाणा सवाईमाधोपुर खबरनवीस बतायो के संवारे रा कोहरा पाछे दिन मांय व्ही बिरखा ऊं गलन बध ग्यी है।

मौसम केन्द्र जयपुर रे मुजब आज टोंक, जयपुर, दौसा, करौली, अलवर, सवाईमाधोपुर, बारां, कोटा, भरतपुर अर धौलपुर जिलां मांय बिरखा व्हेवण अर कठे-कठे ओला पड़बा रा आसार है।

000

जैसलमेर जिला मांय लारला दिनां मर्या मिल्या प्रवासी पक्षी कुरंजा रा शव रा नमूना री जांच रपट मांय बर्ड फ्लू री बीमारी री ठा पड़ी है। ई पाछे चिकित्सा विभाग, पशुपालन विभाग अर वन विभाग सावचेत व्हे गया है। जिला प्रशासन री ओर ऊं क्विक रेस्पोंस टीम बणायी ज्यी है जद के पशु पालन विभाग अर वन विभाग ई मिल र क्यूआरटी बणायी है। ई सागे ई वन विभाग तळावां माथे चौकसी बधा दीनी है।

000

सवाईमाधोपुर रा बजरिया अर मानटाउन शहरी प्राथमिक स्वास्थ्य केंद्रां माथे आज मुख्यमंत्री आयुष्मान आरोग्य फॉलो अप शिविर लगायी ज्या। सड़क सुरक्षा सप्ताह रा तैत लगायी ज्या आं शिविरां मांय जनता री आंख्यां, दांतां, कैसर री बीमारी अर ब्लड शुगर, ब्लड प्रेशर री जांच करीजी। ई सागे ई आस वाळी लुगाइयां री जांच करी ज्यी अर बच्चां रे टीका लगायी ज्या।

0000

प्रधानमंत्री नरेन्द्र मोदी आकाशवाणी ऊं प्रसारित कर्या जावण वाळा खास कार्यक्रम **मन की बात** मांय ई दफा 19 जनवरी दीतवार ने विचार बतावेला। आकाशवाणी ऊं ओ कार्यक्रम दस साल ऊं बत्ता बगत ऊं प्रसारित कर्यो जा रह्यो है। ई महीना मन की बात कार्यक्रम री 118वीं कड़ी प्रसारित करी जावेला। ई सारु आप ई 17 जनवरी ताई मुफ्त नम्बर 1 8 0 0 - 1 1 - 7 8 0 0 माथे राय अर विचार भेज सको हो। ई रे अलावा 1922 नम्बर माथे घंटी दे र एस एम एस ऊं मिल्या लिंक रे जरिए ई सुझाव भेज्या जा सके है। नरेंद्र मोदी एप या माई जीओवी ओपन फोरम रे मार्फत ई ऑनलाइन तरीका ऊं सुझाव दिया जा सके है।

000